

摛藻堂四庫全書薈要

集部

欽定四庫全書會要

集部

御選明詩卷二十八

詳校官原任主事臣李斯咏

欽定四庫全書薈要卷一萬八千五百二十八集部

御選明詩卷二十八

五言古詩十三

張翀

別貴竹諸友

十年與君遊千里與君別
把袂意不言含杯氣欲絕漸
隔瀟湘雲空留夜郎月一曲瑤琴彈知音對誰說

楊綵

鴈門述懷

昔稱鴈門郡嵯峨抱萬山樓煩隱天際滹沱水潺湲寒
沙慘白日北風推朱顏封侯詎非願王事顧多艱丈夫
志四方茲遊何時還

李叡

曉夢陳晦伯

人皆競榮達君獨嗜編撰廿載歷中外蹉跎寡青眼竭
來共為郎相過每二莞溪水鳴小筵花林具薄饌修禮

或五牋餐和詎一盞直衷肩衛鮆博物攷鄭產鼴鼠渙
羣疑竹書徵脫簡伊余硜硜心相得意何限一朝江浦
別重覩杳未僕春夢兩悠悠覺來淚痕潛我聞天中山
青霞接嶺峻何時攜謝詩青天醉新醕

雨花臺讌集

休衙松日高出郭溪風送蘭棹漾晴波花林暖香夢輕
雲蕩我胸萬象可撫弄綠竹搖崇丘青烟發巖洞踞險
把金樽悅此山鳥哢翩翩遠帆回稍稍疎鐘動良會不

可常歸鞍且遲控

送唐生

江頭春日高
看爾乘汎去
淑氣澹宜人
淮山雨邊曙
田鼠方化鴛
岸柳未成絮
傾囊貯詩草
撫誦自厭飮
釀酒邀花神
江山發靈助
長安九天高
文章滿朝著
男兒筆札間
往往收名譽
時復夢江南
羈魂向誰語

周詩

赴天津

仲夏衆芳歇沃野羣卉凋曜景窮北陸薰風獻南陬伊
余赴期會東鶩戒方舟晴雨遞昏晝涼燠變絲裘潔澗涸
見湖澳寂歷懷滄洲結髮事明主策勲慕前修名賤業
匪建時往命不猶才將世塗左道與隱者謀漆園侈達
生柱下崇致柔優哉聊卒歲庶以謝愆尤

胡直

登衡嶽

弱齡慕遐舉中為世網嬰雖抱及物志而非濟時英家

本衡廬交早負泉石盟秉憲涉湘沅吏事滋牽紫靈岳
奠疆域渺若隔蓬瀛恭承帝新命駕言自西征迴車恣
探歷使我夙心傾朝墩蕩雲囀導我游上清吾衰疲塵
鞅學道未有成安得同心友眷言事耦耕

姚汝循

夏夜對月

落日暑暫歇微風蕩靈襟竚塵淨庭宇竹樹森繁陰皎
月牆東來照見石上琴揮手一再鼓悠然生遠心鍾期

久不作千載誰知音

沈節甫

題且住軒

此邦非吾鄉此室非吾廬情知匪久客且復卜其居蕭
蕭環堵中俯仰欣有餘天地為逆旅百年亦須臾羲娥
無停轂吾生自有初念此坐長歎秋風起庭樗飄蓬任
回飈素位恒晏如

錢鎮

山中雜興

結廬傍青山繩樞瓮為牖生涯陌上桑行逕門前柳獨
行媿踽踽顧盼無與偶策杖求友生陶潛去我久豈伊
逃醉鄉翻念魯中叟寂寞柴桑間寄意千載後廬山舊
遊路往跡今已朽古今諒同轍悵望一搔首

張祥鳶

雨後偕沈道升登華陽

微雨曉來歇新晴媚花柳愛此風日佳尋山挾歡友呼

童巾柴車行行上隴首蒼翠近轉濃攬之欲盈手佳木
翳清泉雜英被林阜為訪稚川家仙桃著花不

石湖訪舊

黃葉落不盡平湖澹無波泛舟湖上來訪舊青山阿長
揖謝故人六載今重過豈不念清標遠道成蹉跎向來
山中月依舊清光多呼酒斟酌之君起為我歌歌長山
月落醉顏亦已酡揮手別君去奈茲良夜何

虎丘山房

僧屋翠微半窈窕青苔路空林無鳥聲白雲自來去遠尋素心人直到雲深處振衣臨高臺夕陽在紅樹

晚春韋莊水亭

十日不出門出門芳草晏遠岫晴雲滋緒風啼鳥變高樹夾廣路雜英滿遙甸入寺不逢僧經聲隔松院嘯坐小山南紅藥當階亂曲池清且連明滅孤亭畔蒲葉綠於水藤花落如霞斗酒價十千春衣聊可換

濟上曉行

水落不盈尺舟行悵多阻對此明月光清宵泊枉渚夜
闌新水來稍覺舟人語解纜及晨流孤帆曉容與攤書
坐蓬窗風簾散微暑遠視浮雲征飄飄薄何許豈不戀
舊山隨風忽遐舉感此賦行邇含情獨延佇

東郡道中早行

雞鳴庭樹曉漏斷晨星疎濃霜白於玉皎皎塗階除攬
我征衣裳出門復驅車數里始辨色井屋炊烟初日氣
結朝霞絳色橫扶餘已欣遠懷曠復懽塵眼舒馬嘶驛

樓近晨風吹白榆計程尚千里歲晏歸吾廬

招隱山樓看月

長嘯翠微半山月忽東上松際露清光攬之不盈掌歡
友兩三人開窗坐間敲宿鳥赴幽期飛泉遞清響有酒
旨且馨有月皓以朗長吟招隱詩臨風寄遐想公子歸
去來山中瑤草長

題閔道士山樓

仙人喜樓居架樓青山曲嘉樹一千章色映窗櫺綠調

鶴白雲端汲澗華陽麓來往不逢人馴鹿閒相逐

東平道中

驅車涉長道荒塗曠無人斜陽澹古木驚風翼征輪候
館莽牢落日暮寒城闕停驂一以憇振我衣上塵庭樹
集歸鴉依依得所欣如何客遊子不念平生親

申時行

遊一雲寺

寺在晨臺山下
其地有菊泉

散步出平林窮攀躋高頂冷然天風來曠蕩非人境晨

臺聳翠屏菊泉注金井丈室禪燈明祇園佛日永青浮
雲一丘碧破天萬頃古檜結重陰疎篁散清影寺深山
更幽雨至風忽猛繞徑莓苔生憑軒衣袂冷坐久不知
還盤桓弄餘景勝遊俱幻迹悠然動深省

登穹窿山入寧邦寺

昔聞陽山高不敵穹窿半而我登其顛振衣凌汗漫居
然五嶽尊突作三吳冠天目來蜿蜒具區環浩渺排雲
豁洞庭出日恍秦觀邃谷吐烟霞層巒入霄漢盤紆磴

道危杳靄峰紋亂石裂紛下馳厓崩劃中斷凌嶒結鷺
頭逶邐出龍幹鐘磬發林間招提在天畔古松剥生皴
豐草深沒骭藤塢既蒙茸雨泉亦漫漶傳聞古魚更自
日生羽翰仙踪不可求目境有餘玩辟穀辭人間頗與
赤松伴

感懷

朝旭暎芙蓉天然發華姿涼飈振梧桐落葉何紛披物
性從所受榮瘁固有時璣衡自旋轉陵谷常遷移良貴

匪軒冕真樂在茅茨所以考槃士衡必獨棲遲亭亭傲霜柏藴藴傾陽葵優游以終老素心恒自持

林煙

諸公餞送城南樓寄謝

冉冉歲云暮于役殊未休冠蓋集相送置酒城南樓微雨霽朝景騁望消人憂蒼蒼遠山色浩浩清江流丹楓羅曲岸白鳥戲中洲景物紛可悅驪歌促行騎衡門昨棲遲杖屢忝從遊奈何遠離別一日如三秋索居感羈

旅久要慕前修適意豈非達徇祿良足羞山靈勿相謂
早晚歸林丘

府江渡

朝發陽朔崖暮次昭潭渡行邁千餘里孤舟日東駕川
途阻且長耳目漸非故嶺巖夾崇山杈枒羅茂樹四望
寡人烟三時昏瘴霧深林蹊徑絕怪石波濤怒虎穴幸
徒蹤狼烽猶置戍客子獨何為艱險常道路雖懷叱馭
心寧免垂堂懼白日易蹉跎玄髮忽改素人生苦拘束

多為浮名誤萬事良悠悠達生庶可慕

苦雨述懷

我行赴京華征塗纔及半渡江越淮南原隰何渺漫溽暑當茲時氣候變昏旦迅雷激中宵陰雲翳層漢山雨驟淋漓川流俄皓汎陽烏避何許水鳥羣相喚高浪沒危橋飛湍瀉崩岸我馬淖不前我車輶已斷屈詰歷羊腸回顧屢顛汗僕夫仰天號客子撫膺歎吁嗟行路難彷徨日將晏塵中苦局促物外思蕭散挂冠亦由人何

事長羈絆

王叔果

聞鴈

涼風起天末孤鴈獨南翔攬衣步庭除仰視明月光舉
酒屬賓朋歡宴夜未央憶昔事遠遊客居易水陽迢迢
望天末鬱鬱思故鄉噭噭聆飛鴈零零霑衣裳感之一
懷注惻焉棄椒觴往事不可陳終夜徒悲傷

山齋獨坐懷友人不至詩以招之

投迹寄空門幽懷日虛泊境寂山氣佳日午庭陰薄新
鶯未停轉初篁漸舒籜愛此林樹芳窅然坐丘壑故人
萬里至約我移觴酌今朝風日熙乘閒眺虛閣

別高叔崇

仲夏林木變愛此黃鳥鳴同聲宛相和悵然懷友生良
辰忽以改歡會難久并征夫理鞍轡夙駕侵晨星停驂
酌君酒湛湛芳尊盈

尊盈豈不飲離緒紛難任送子陟岡阜浮雲布輕陰悠

悠導往路默默涕盈襟豈無同門友念子意彌深游鱗
戀新侶飛鳥懷故林湘江浩無涘衡嶽何嶽巒願因秋
風起惠我瑤華音

錢貢

京邸懷歸適唐楮汀來謁於其還賦長句言別
此日意不樂掩闋有所思忽聞君遠來錯愕令我疑平
生不辭鄉安得來京師去年與君別屈指已一期南望
懷故人日與浮雲馳嗟予坐羈束素顏日以繙金門盛

才賢迂疎將何為感之百憂集歎息還自嗤君今馬首
南握手復何辭投簪雖未能煩君語吾兒貧賤雖爾慚
富貴匪我期願言各努力勉將門戶支予家祚溪東綠
水環茅茨豈獨饒桑麻松竹植亦宜好闢十畝園樹藝
須及時護筍編枳棘灌花引泉池待予此中老與君同
栖遲此願良未果永懷常在茲去去勿復陳人生多別
離夜闌欹枕卧暑雨捎眾恩

許國

登風月樓度凌波橋憩愛蓮堂觀荷有作

南國芙蓉花昔賢聊寄意芬芳播海隅臺沼足佳致層
樓瞰清冷孤樹隱荷芰水上卧長虹空中舉香袂凌波
弄素影俯檻散幽思殘萼已飄紅疎莖猶疊翠杯搖暮
霞色衣染秋霜氣澹爾言已忘悠然心自媚盈盈隔笑
語采采憶交契落日更登樓風月見光霽

擬御製勸農詩

四民皆天職嗟農獨苦辛所以古哲王巡省及茲辰簫

鼓吹幽詩訓迪良諄諄東郊土脈動好鳥鳴芳春桑間
拂其羽催耕一何頻乘時播嘉種原隰何畊畊念茲民
所天珠玉安足珍一日苟不作飢寒將立臻勿惜沾體
勞但憂年歲屯沾體勞尚可歲屯傷我民憶昔先皇時
端居軫郊閭載賡憫農咏丕揚烈祖仁禁苑藉千畝雨
暘雲百神玉食豈不足貴令四海均九重高結念况爾
謀其身古人有良言歲計在寅豈伊公家賦婦子亦
相親春風正發育萬物皆鮮新勉以東作力佇見西成

禋

周子義

送何小坡致政還信陽

海鶴遠置網冥鴻謝羈籠人間千丈絲安能繫游龍所以達命士脫迹塵囂中眇茲盈尺組曾是羈我躬何侯東海彥司牧早奮庸一麾指淮右載旆佐漢東斯民有父母國論方爾崇宗甫竣事高蹈隨赤松薄言戒行李云歸天目峰惜此遠行別不得少從容載歌驪駒詞

聊以紓我衷

林如楚

翫月有所思

白顥應潛運朱明時
浸沉回飈釋炎溽虛堂延夕陰簾
透雲光薄池涵苔色深
螢火穿野蒿牀下莎雞吟如何
衿緺子佇受涼氣侵
素月出東嶺飛輪迴自揩金波沒
遠漢翠靄掩修林茂篁無疎影
栖鳥有駭音泠泠鑑冰
簾悠悠滌予襟翫茲不成寐兀坐思難任
北牖湛清酤

東窗開玉琴不惜斷琴絃但恐傷琴心傷心在何處宛
在滄江潯勞我伐木意叢桂祇蕭森

潘志伊

題存石草堂

名園迴塵域參差開石林丹梯襲曉光碧嶂含夕陰昔
自鬱林來置此間幽襟緬彼巨靈跡宛在梧江潯夫子
肯堂構誅茅面雲岑棲巖意已遠陟岵思逾深摵衣緣
磴道拭目見嶽峩茲言懷仰止誰謂愜登臨

歸有光

沛縣

泗水抱城闉東去日粼粼豐沛至今存漢事已千春嗟
我亦何為獨歎往來頻封侯不可期白日坐沉淪每見
沛父老旅行泗水濱空傳泗水亭井邑疑未真城外綠
楊柳高帘懸風塵猶有賣酒家王媪幾世親高廟神靈
在英雄却笑人

自海虞還阻風夜泊明日途中作

百里見青山言旋諒非徐風波仍水宿龍蛇驚夜居明
發尤慘淡川途尚修紓水駛凌方約雲寒日未舒彌亘
多芳草寂歷少畋漁寒光冒明湖朔風轉高墟舊事成
往跡餘生惟讀書古人不可見歲暮安所如

淮上作

長淮餞落日圓光正如赭傾紅注流波殊景不可寫淮
水自西流黃河從北下併合向東行終年無停鴻哀此
千里客春至復已夏獨立空惆悵所與晤言寡

奉託俞宜黃訪求危太樸集并屬將蕭二同年

及長城吳博士

昔年宋學士嘗稱太樸文獨力撐頽宇清響薄高雲余
少略見之諷誦每忻忻淡然玄酒味曾不涉世氛如欲
復大雅斯人真可羣苟非知音賞宋公安肯云嗟乎輕
薄子狂大方狺狺惜哉簡袞亡家麗少所蘊徒為嘗一
鬻盈鼎未有分四賢宦遊地博達多前聞為我一咨訪
庶以慰奉勤

磧砂寺

望見石柱立知是招提址蓮宇已燹蕩土牆何迤邐淡
淡遠天色梅花帶寒雨溪迴竹樹交風吹鳥雀起日暮
湖波深蒼茫白雲裏

和俞質甫夏雨三十韻

浮雲方靉靆光景遂已戢浹旬深霪澍千里破封蟄茫
茫河伯歎蕭蕭山鬼泣靈曜邃高居朱明闕赫翕希微
澹將開淅瀝吹又急遇夜轉連綿釅流更洽漎萬壑嘵

震鳴百川灌注入池容添紋縠林色浸淤泥離畢月暫
耿宿井星恒濕激灑湖光翻蹙咽海潮澀霓旌尚高翔
雲衣猶日緝水覆詎可收天漏誰能葺馬牛三江混鴻
濛九峰立嗟我來自東獨行阻虛邑夢裏思明雨笠坎
成游習誰假卜商蓋但戴杜甫笠纘紛餘花落寂寥愁
烏集窮巷長閉門高河近通汲天地政氤氳雷風遙呼
吸悽悽聽晨鳥濛濛睇宵熠作火徵時暘思文憂民粒
鼈鼈費灰洒魚蝦饒掇拾廣室坐增悽匡牀聽生悒何

由度日閑安能使家給泥塗路重繭梅潤侵什襲寒袍
故戀繩瀾簡慵啓笈顧歎風雲滿寧使蛟龍蟄短屐徒
齒齒折巾空岌岌俯仰觀宇宙坱圠北迷原隰阻饑知不
免寅亮豈所及

邢州叙述

為令既不卒稍遷佐邢州雖稱三輔近不異湘水投過
家葺先廬決意返田疇所以泣岐路進止不自由亦復
戀微祿敝裝戒行舟行到齊魯園花開石榴捨舟遵

廣陸黎棗列道周始見裁首蓿入郡問驛駟維當撫彫
療天馬不可求間間省徵召上下無怨尤汝南多名士
太守稱賢侯戴星理民政宣風達皇猷郡務日稀簡吾
得藉餘休閑門少將迎古書得校讐自能容吏隱退食
每優游但負平生志莫分聖世憂竚待河冰泮稅駕歸

林丘

袁尊尼

長安感遇

朱華謝南土遊子客冀方豈不念遄歸簡書勞未遑悠
悠若懸旌倏忽意靡常魏牟阻江海蘇子怨河梁失路
良可悲曠望迷周行春陽念將歇滯淫非我鄉願假輶
斯翼超飛厯故疆

施愛

寄李五

噫嘻復噫嘻與君恒別離祇隔一溪水相見良難期芊
芊池畔草灼灼園中葵倏然悲風來凋謝實淒其思君

令人老玄鬢忽成絲贈君青萍劍神物各有時

王嘉言

遊清涼洞

山行恣眺望物色有明晦逼仄紆筭徑纊紛洩竇瀨窟
壓雲水邊步蹠磽確內深探毛骨淒周視巖壑大峽束
路若窮石懸勢欲墜翁蕙古樹排巔峯細岑對蕊開噴
微芳衣潤浮幽靄搖竹動碎金翻羅拽長帶奇峰喜駿
犧飛泉駭駮磕罰籌凝蝶毛謹聲混江汰將暝促駕還

共愜斯游最

皇甫沖

維摩寺雨坐

回嶺無仄徑陟岡有夷壤展睞入空濛遊心益昭朗長
風吹輕衣飄搖翠微上古寺迷夕煙明燈澹綃幌冥雨
從東來驚雷自西往林巒忽不見但聞山澗響景寂非
避喧心瑩乃成賞為禮沉疴踪因之知幻象

於巖石上眺東西兩湖

旭踐山中蹊午憩巖上石雲移石欲墮雨霽蹊猶濕倚
策眺兩湖波光渙相襲東若既紓青西衡亦凝碧芙蓉
落雙鏡天影浮重壁不覩水分流但覺洲如織檣鳥有
離聲磯鷗無並翼會茲物化情感彼高深迹從適得所
遣何為苦拘迫

上已觀田橋祓禊望所期客

青山結層嵐新流漾周澤陽景屬良辰遊人滿晴陌聯
翩塘上行去來江邊客拾翠行且留擷芳散還集臨賞

遲所思搖搖冀來覩夢寐時見之寤言忽復隔昔人三
秋懷宵旦今屢易為問修禊人憂心何能祓

皇甫涍

代古

朗月升東隅流輝照苦顏愁思撫清夜房櫳淒以閒玉
墀花稍積簷鳥雙飛還凝薰空錦食游塵集綺絃馳波
宣盡意浮雲難結言所恨千里遙所望一水間

春朝雪後

拂曙啓荒扉雪照蘭林瑩迴榭眺氛氲層原闊彌亘春
動鳥數聲晴閑煙一徑欲訪垂綸人悠然五湖興

發郡城之天台道中述所經覽寄孔謝二憲副

趙何二僉憲同年

夕夢層城阿曉行滄波上繫溪復含流連岑時隱障風
湍信千轉雲峰非一狀錦繢紛迎翫氤氲忽彌望蘭泉
芬可掬苔壁險難傍思偕同懷子携手追僉尚

雨夜雜思

清齋隱蘿月簷暝滋林巒澤國夜溪雨亭皋春草寒山
光帶滉漭池響交檀欒憶處畏入夢遙遙獨寤歎

春日齋中即事

仲春氣妍和蘭薄幽可踐開軒眺遠野文霞靄層巘黃
鳥鳴芳菲綠蘋泛清淺感物懷古人絰帙聊自展嘗欽
柳下默頤悅邴生免苟持齊物心得喪兩俱遣

雜詩

凝霞晦朱陽繁雲結玄陰有渰興崇朝淫溢遂成霖涌

溜交簷曲浮苔冒水尋冥霧紫綠池悲風激丹岑惟彼倦遊客感此物序侵慕類興長懷含思寄微吟

秋日雜詩

廓處乏歡悰出門眺長衢悲風吹落日四顧無行車蹉跎失盛年感慨獨嗟吁况我在樊籠六翮不得舒撫劍思西邁安能守故廬淮陰困閭里馬生戀邊隅桑梓豈我志蓬藿非我虞行行舍此去去去浮雲俱

贈韓侍御謫滁州

皎皎原中日，照此城闕寒。
登山送歸客，臨塗悵盤桓。
問子何之奇，服涉江干遠。
斥千里道飄飄，冒驚湍急鷁。
遡征雲悲風激，長瀾我馬懷。
層岡佇立發哀歎，恍恍無所道。
贈子以加餐。

月夜贈伯氏叔季氏山人以言

歡游美清夜，高會良在茲。
金鼈薄綺襦，鮮雲蕩華池。
涼氣發喬林，湛露零丹蕤。
皎月升前隅，中庭粲其輝。
密親既已具，蘭友相攀追。
繁音豈不奏，所樂吹埙箏。
齊願等。

金石皓首長不睽

送周氏

清晨餞我友駕言遠徂征前瞻齊魯墟千里浮雲興親
交豈不昵懷役不遑寧曠野饒悲風揚塵翳邊庭中衢
雪霰集邊馬寒無聲蹊谷無行跡側足層冰橫回首望
京闕能不惻中情子其祇自愛順時保榮名

予嗜琴山人張子妙得古法嘗學焉而予輟響
久矣舟夜臨流對月發琴而彈之興既命篇

伊予寡世姿由來慕丘壑長從嵇生玩假物思所託匪
盡至人理聊叙逸民樂改服睽宿心久負長往諾石房
綴幽響泉蕊迎秋落沿泝開昔襟浮彈昨間作滄波流
潺湲明月照灼爍想見乘風人長懷披雲鶴且以慰營
魂拊心終緜邈出處焉是非俛仰笑今昨

雜興

驚節流炎紀馳暉屆清商游魚湊重淵蟋蟀鳴空堂白
露滋前墀陰風來北房我心亦何思所思天一方離居

宛如昨再覩鴻雁翔含情撫遙夜申旦獨彷徨哀彼采
葛詩零淚沾衣裳

茅山

杳靄登春山嵯峨入雲嶺徵奇不覺遠發興日初永石
叢孤亭秀花覆仙龜冷長揖山阿人坐使塵慮屏

自溪口歸

朝來醉別酒溪上孤舟還遙村轉江路落日迷松關平
波望煙樹百里蒼茫間坐愛丘中事春雲留碧山

使中都道中作

將命適遠京夙駕戒征侶臨流別友生野塗曠延佇
恭爾所敦我志不遑處揚旆越修垌舒節薄蘭渚日夕
秋風生曾是歲不與淒淒聆候蟲肅肅望歸羽蘊結愁
我心沉憂誰能去悟彼詩人言歸來藝稷黍

皇甫汸

夏日來鳳亭小集各賦

首夏猶芳月終宴就薰風泛觴蘭水上置座竹林中飛

花代舞似鳴鳥當歌同笑將愁暫破醉遣累俱空更待

西園景留賞北山叢

春夜游西園同諸兄弟作

佳節值瑤燈清夜游金谷良友披蘭襟懿親儻芳躅經
過敝榭邊徙倚寒塘曲遵渚雖近尋覩峰生遐矚軒冕
幸暫違薄領謝羈束跡非三徑荒情是一丘足鏡裏髮
始華尊中酒初綠及時不為歡坐遣春光促

奉荅子安兄歲暮見貽

在昔參英僚俱承明主顧被服紛妍姿
飄纓儼芳步悲哉游子情徒以潛郎固一為衝
驪激遂使佳期誤入魏悵無倚浮湘眷有慕
揚旌指敝廬千里同歸路再聞蟋蟀唱兩見
薰葭露曜靈本易傾馳運豈難度端居懷苦
心苦心誰與晤但感時不然何嗟歲云暮

始至瀘州作

自我謝郎曹竭來守吏局塌翼懷奮飛低眉就羈束驅
役遵旄丘興歌睇淇澳愧乏沂海謠何以佐明牧幸寡

宣城辭間可理尺牘升旣等凌喬沉亦悟波復芳草合
江程清猿竚旋轂衛水日東流因之鑒心曲

同蔡中郎過王貞外宅懷子安兄

委巷駐高車清溪夾幽宅細雨急逝年凝燈照寒夕依
同南樹情飛異西陵蹟為假雲中翰一寄天台客

往視城南別業

夙齡不事產落魄懷英風抗志雲霄外絕戀蓬蒿中避
世豈在遠漢廷聊見容未識山川險安知途路窮兩自

違京輦久欲返臨邛疏公有遺業精舍開牆東命策值
蕭序覽物感情悰逕密多陳莽林荒非故叢昔往候門
稚今歸成哀翁鳴蜩若騰笑馴磨儼相從搏飛之高翼
何為苦微躬吾廬倘可適稅駕幸來同

鳥散餘花落

春來啼鳥伴相逐百花中棲處迷深綠飛時帶淺紅祇
惜香沾羽非關嬌惹風回看意不盡猶是戀芳叢

空梁落燕泥

金闈春色早玉闕芳信賒人歸翻後燕淚盡每先花戶
暗香泥積梁低舞影斜不作雙飛去東鄰王謝家

張仲讀書吳山

輶養辭南陔駕言邁西郭問子將何之避喧謝羈縛堂
間豈不懷雲林諒有託風叩支闌清月鑒董帷薄披帙
就長明靜夜靈花落羊亡屏意筌猿定啟心籥幽谷聞
鳥鳴澄湖眺魚樂霞綺雜烟絲桃柳互紛灼時枉塘上
篇日積丘中作焉得奮羽翰因君適寥廓

初發京口

少年慕攀鱗千里輕徒步媿登廟姿亦謬臨軒顧朝
躋赤墀塗夕騁青門路寧知世網嬰遂為儒冠誤昨浮
湘江還願守箕山卧不勝戰者勞心跡兩乖忤解纜指
廣陵眷戀未能渡興歌矚流波庶幾照情素

秋夜偶作

晚歲絕外牽懼悰寄所適皓齒發新聲蛾眉矜故色變
態逐情生羽商隨意易冶豔詎有央靡曼信無極歌方

一再聽行期三五夕淫雨忽東來素輝乍西匿金尊悵
屢空玉趾邈難即露砌寒蛩鳴風窗起歎息

秋夜把酒對月

宋生陳九辨陸機歌百年悵茲清秋日聊使幽懷宣矯
矯歸雲鴈嚻嚻含風蟬催芳委朝露俄景流夕川鱗運
有代謝莽榮無常妍始知行樂貴何用居情牽長夜思
秉燭新月正登筵金尊泛綠醑寶瑟絰朱絃商歌當舉
下楚舞出花前餘名焉足藉達生乃為賢

仲秋之月諸弟燕私風月雖佳雲雨或間

良辰信具美清夜永為歡明月已幾望華彩流雲端廣
庭置芳座高會列盤餐但云杯行緩不惜露下寒情來
感今易跡往戀昔難一聞關山曲猶似別長安

敦賞每卜夜行樂聊及時秉燭且不寐待月豈云罷鱗
鱗玉葉薄皎皎金波遲高臺臨窈窕迴塘生漣漪載歌
蟋蟀唱復詠鶴鵠詩清輝一以鑒素心同所期

嘉月有餘照歡晤無限情寵弟載旨酒要我坐華楹蓂

齊英復萎桂滿輪乍傾忽忽愁霖至濶濶悲風鳴圓缺
旆相運明晦焉足驚太康靖往訓知止崇令名

秋宵酬子安兄作

清夜游家園眷言懷丘壑素月升員靈千載共寥廓始
出東南樓俄頃西北郭華燭滅蘭堂金波蕩羅幕雖過
二八時光彩紛綽約商歌正流響魯酒亦未薄人生貴
適意何為坐羈縛結髮從至今朱顏悵非昨治服宜常
翫榮名焉足託良會聊具陳麗藻復間作穆如揚清風

粲若敷春萼申意忝惠連何以獻康樂

秋日往梅林莊居

疏公守舊業班生慕常廬薄遊千里外一出十載餘偶與密親邇愁焉懷所居東林扉尚偃北郭徑始除青山藹盈戶綠水湛通渠流盼悉成往眷言思遂初將從古
人學乞歸事耕奮顧驚年跡乖坐使情興糾

皇甫濂

不赴郡檄荅子循兄

矯翮思霄翥游鱗託淵沉物類各有違殊塗難並尋宜
伊世網慮擾擾誰為心振衣還東山寢迹棲舊林江海
多風濤舟楫弭川陰無令衝波激但恐歲序侵願言謝
西府谷口有巖音

昌平登陽翠嶺望居庸

漁陽通古北上谷邇皇州縣山帶西日重關枕滄流澄
霞澗影分歸雲嵐氣收陰厓忽成晦夏色驚先秋無以
行邁心恤此烽烟愁伊昔布駿略婉矣幕中籌匪今重

俠士自古并與幽傷哉投筆懷白首何所求

從僧簡經說難

少乏經世姿長逢行路迫何為百歲間坐使千慮積薄
從沙門遊聊與同所適風遠水木華雲興梵鐘夕委叩
愛良託空情藉深譯曾是投石心對爾翻經席迺協支
許懷焉貴軒冕客初服儻有期永願庶可卑

馮惟敏

七里溪別墅

知足始遠辱至人貴自全不羨公與侯所志受一廛吾
家有舊業乃在城東偏一丘藏一壑宛轉依清川生涯
故不常中道成棄捐棄捐從此去一去二十年非無五
畝宅在邑多糾纏幸茲協初心歸我汶陽田

我田無遠近處處緣澄溪朝發巨洋許暮泊野水棲野
航流北陸香稻來東齊宜伊貴異穀美利貽蒸黎名山
近村落迨暇恒攀躋仰瞻霄漢遙俯眺浮雲低翩翩比
翼鳥乃在太行西終歲不合并激昂飛且啼

東郭次甫

送子遊東岳五月渡長淮誰言獨往人

次甫自號
獨往也

中道

臨當乖乘流豈不返何以安予懷一諾重平生三年今

始諧心期在山水所貴敦明儕秋日動遐思良夜聞高

齊螢火照裳衣蟋蟀鳴庭階何時披素襟一笑遺形骸

馮惟訥

吳郎坐見人餉衣香戲贈

湘君搴薜荔魏帝采蘿蕪盤龍連理帶翠鳳合歡襦不

能機上織學作府中趨定知香十里終然傾五都

侯一元

書扇贈王少華

古人有遺言惟白可受采齊紈變蟬雀昭質復安在願持君子心如月初離海太空無纖翳淳白終不改四海揚仁風蒼生良有待

侯一麌

和家兄南塘樓居書懷

人意各有適自得貴不違潛艸本淵媚冥鴻入雲飛自
是愛芳草非關薄紫微南塘山水清可以築釣磯曠野
一登樓青村四作圍出郊甘離索高齋保玄虛日夜起
棹歌處處見樵漁野老多農語東鄰聞讀書避地翻近
人臨潭非羨魚當知陶晏意奚必塵市居

高岱

感興

天貪不中規地方不中矩人生天地間安得無齟齬仲

尼屢放逐顏回苦貧窶賢哲不偶時古今那可數達士
貴樂天仁人亦安土勉哉宣令德庶以表千古

鴻雁萬里來翩翩渡彭蠡海燕去何之秋風辭故壘去
亦不足悲來亦不足喜物性各有適景光一何駛運至
疇不興時過亦云止世事俱茫茫靜坐觀無始

何良俊

春日寫懷

東方雖大隱終是漢庭臣如何敢恣肆嘲哂萬乘尊武

帝本愛才寵賜亦殊倫
百金買少婦終歲輒易人侍從匪
孤遠諷說恒見親當時非不遇傲兀竟何因
我今六尺軀頭白久沉淪始圖佐明時一官終為貧比肩侏儒笑爭食雞
鶩嗔放身鹿豕場終勝金馬門若非速謝去孤意何由申

包大侍御冬日過余城館見貽新詩率爾奉酬

弱年慕大隱中歲棲附郭試以愜微尚兼用諧勝託環
堵有舊營山楹無改鑿高樹列偃蹇羣峰羅乍萼輕颺
披蘚房微雨灑菌閣新竹漸紫苞繁花吐芳萼春歸競

敷榮秋至同駕落林卧閨代謝天游恣寥廓遺形偶斥
鶗混迹隨屈蠖豈無寰市喧幸免纓組縛畢歲矢勿謾
中懷諒無怍包子臺中彥風期眇丘壑暇日訪衡茅投
我游園作委曲陶令言纏綿尚平約丈夫貴得意乘時
展明略勉終天上期庶果林中諾

何良傳

贈徐伯臣補奉化令

嚴程忽云屆將子臨河橋弱柳向微風黃鳥時交交感

物傷余心申爾以久要雖有盈尊酒何以永今朝徘徊
意不極揮淚發長謳

金大輿

與文源朱二過溧陽道上

侵星發徂轍悠悠即長路家人前致詞問我將焉赴躬
耕苦旱乾何以資朝暮衣食事奔走晨寒犯霜露楓林
號夜鳥宿草棲寒兔輕烟動墟里崩沙依淺渡悽淒浮
客心黯黯長天霧逍遙思孔檸濩落嗟莊瓠去去返蓬

萬脫粟安吾素

路岐苦奔峭村舍多蕭索遠水明石渠疎雨散林薄唧
唧棲鳥喧澹澹油雲漠頽陽即主人野飯開山酌窮途
賴所歡言笑解寂寞丈夫江海心何事勞羈縛弭棹息
遠遊長歌畊負郭

塘中亭子初成

抱僻愛丘壑緣厓築幽居雖無墁堊工清曠情可舒陶
子樂容膝諸公甘草廬達人貴適意豈必輪奐俱山桃

發當戶。听柳垂前除。青柯集鳴鳥。碧水浮游魚。禾黍被
阡陌。鷗鷺戲菰蒲。高天豁朗霽和風。飄輕裾。明徒時枉
臨命僕具園蔬。一觴自斟酌。清言常晏如。悟彼蟋蟀詠。
逍遙百慮祛。

李攀龍

錄別

秋風西北來。蕭蕭動百草。蕩子無室家。悠悠在長道。紅
顏能幾時。棄捐一何早。對客發素書。零涕復盈抱。上言

故鄉好下言故人老

集張使君別業

清河迅寒流金輿杳空翠秋氣下高原蒼然西北遇返
照散疎林蕭條煙景異零落復佳期茅茨況幽致握手
平生人笑談出往事舊遊數子盡風流吾黨備千金抵
白髮一醉滿君意

答寄俞仲蔚

太乙貺漢德名駒生渥洼赤汗霑青雲長嘶挹流沙飢

酌玉山未渴則飲其涯翹尾以躡躅駒騮相經過不願
游間闔况乃服鹽車世豈無伯樂垂耳奈我何天子發
素書使者出蹉跎駢駢十二閑駕馬常苦多雖有千里
姿羈絆非所加

集開元寺

流陰拂層岑返照翳深谷古寺入蕭條迴巖抱幽獨梵
影淨香臺鐘聲殷石屋絕壁棲禪誦懸厓下樵牧秋花
雨還瘦老樹霜逾禿寒泉可瑩心白雲况極目登臨客

自佳搖落時何速蔬色蕩腥羶苔光清簡牘新詩發神秀舊遊耿初服歸來杖屢便老去煙霞伏高城出睥睨燈火通林麓言旋轉多興後期此同宿

古詩

孟冬風已厲攬衣有餘歎獨宿知夜長遠客知天寒河漢直雙闕皎若素與紈黃鵠從西南孤飛正漫漫一鳴緩中帶再鳴沾玉顏遊子不可聽令人中道還所以生別離慷慨亮為難

王世貞

碧雲寺泉

蒼龍戢其首日夜漱寒玉助爾松風聲借之竹色綠時從齋厨下泠然注空谷自愛穿雲多焉知出山濁一酌聆斯言徘徊愴心曲

薄暮發古城即所見志懷

一水天未明餘霞亂相射錯落披金膏噴流萬瑟瑟長嘯招天風為我馭海席吳越指掌間黃花正秋色

行淮揚境汎覽社即事有作

湖波二百里元氣何茫茫天隨一線盡日起萬鬢張無論南北風但見來往檣炯若青銅鏡掩映美人妝驚鷗散明玉唼藕奪冰霜纖鱗一入手大嚼無餘觴冥見漁火微靜聞稻禾香榜人前後歌語語子夜長人生劇可樂何如近故鄉

暮坐離賚園即景

高齋語來暝偶爾成幽憇崕嶧石色古窈窕川流細新

月在疎篁娟娟自相媚顧此羣籟寂況焉覩真際欲叩
俄已忘呼杯但成醉

馮子仁先生挂冠長君咸甫赴公車賦此贈別
馮唐厭郎署拂衣卧滄洲有子字王孫頗與史長遊冥
志越三墳英風隘九州飄然赴公車甲第焉足酬三語
司空掾一疏富民侯鄙意稍不然良玉戒暗投不覩長
安市談笑生戈矛桃李駕春風獻態不自羞憔悴離根
株零落委道周竊窺松與柏偃蹇若潛虬鬱作清廟材

竟為匠石收出當承八柱處當傲千秋

早起

初月將曙輝亭亭淡空碧微星漸以隱存者猶厯厯玄
蟬乍停號宿羽時鼓翼時至鐘未鳴山僧嬾成寂

暑嬾

一暑生百慵一慵百事簡偃息衡門下悠悠夢初轉亭
午鳥倦啼槐陰自舒卷時有涼風來冷然忽稱善勿謂

羲皇人此意知者鮮

發自義興由東九抵湖汊一首

揚舲出荆溪，溪流浩無盡。疇謂當蕭辰，青山吐餘潤。驚鱗發潛響，振羽橫遙瞬。時見空翠來，焉知余榜進喬木。生午烟，場禾表秋信。茶叟携筐歸，行歌渺然近顧。余若有適，壺漿當為引。明發從此醉，中宵衣時振。

入林屋洞天不能竟有述

林屋第九天，中藏黃金庭。北穿丈人峰，西達峨眉陘。垂滋結乳玉，穿溜散空青。嵒崿藏石門，嶒峩吐神鉦。是時

秋始暮積潦尚澄盈雖負褰裳勇踝擊中不勝邇慚孺
子託遠媿靈威生誓欲偕青童驪輪探窈冥千載靈文
出聖治冀可徵

王世懋

初夏田家

本愛園林居遠與塵世隔欹枕過鳥啼初陽在簷隙攬
衣臨前除遊目恣所適藹藹千樹交紛紛里煙白清渠
已新苗高壠尚餘麥雀乳深茅茨魚防間崖澤野夫荷

鋤語小婦當窗緝周覽物候齊憺焉忘朝夕薄暮池上
歸苔痕亂深屐

至漆塘絕頂見太湖

泊舟閭門道汀渚生夕曛嚴程指明發展側及宵分雞
鳴舟人語柔櫓聲相聞浩渺煙波間鷗鷺自成羣輕霞
冠初景遠巘斂餘氛日出照蟾蜍鬢若纖雲停橈止
宓妃擊鼓下湘君情境自怡適寧知行役勤

夜泊芙蓉湖翫月

今宵仲冬月忽發滄洲興進艇延素光開樽坐青鏡霜
含煙樹遠塔挂寒山靜何處洞簫聲魚龍夜深聽

謝榛

雜感寄都門舊知

瞻彼終南山松蘿幽且邃中有一真人超然遠朝市手
握神龍珠照夜光自祕石苔積古色斗室廊天地澗泉
為誰清蕙花為誰媚西望徒遐思書札何由寄嗟哉處
流俗冥心可無醉鷁鷁為家祥鳳鸞非世瑞奈何君子

交中道兩棄置不見鍼與石相合似同類文字生瑕疵
鄧林紛葉墜有家早歸歟獨歌以卒歲歲寒元氣塞偃
仰待春事

雨中宿榆林店

涼雨何冥冥黑雲復浩浩山行夜不休破屋臨古道數
口遠相投蕪穢不及埽園荒無主人馬散齧秋草席地
即吾廬餘生聊自保隔林乞火回酌酒慰懷抱反為妻
子嗤寧如在家好

梁有譽

秋懷

夕霽涼氣發曲房
藹餘清金風被蘭茝
白露浩已盈密林
謝陽彩叢薄隕芳榮
迅商無緩調征鴻懷苦聲物候
既易感神理固難名
漢陰甘灌園鹿門事躬畊金張逐
丹轂王貢彰華纓由來事不同
各以性自營伊予秉微尚
恬曠諧夙情柱下明守雌
漆園持達生緬懷昔人訓
煩囂祇自驚

遊白雲寺

崇岫控越徼巍鎮峙郊甸翠嶂憶劫餘迢遞百里見疎
嶺何岑峭楊林鬱葱清峻擬空天平俯瞰海日炫化城
架層巔拂策陟遙峴逢槎舊術迷遭石新磴轉始至嵐
陰豁暫息厓光顯露翳若木莖風墮曇花片鳥啼谷互
答竹亞露猶泣沖襟挹恬寂素想協遊衍靜惟迦葉智
默遡龍樹辨十喻總歸空六塵原不眩清朝意蕊凋縞
夜心蓮現歲月紛遞馳棟宇幾遷變鶴往臺草荒龍去

井泉淺刻桷鼯鼠啼雕梁蜘蛛網
舒卷結桂緒方遙攀蘿情莫展景協賞為美慮澹機自
遣願總塵外轡謝此區中戀

詠懷

心星轉坤維芳榮遽銷謝玄蟬號樹間蟋蟀吟幽榭商
飈蕩陵苔物性隨時化瞻彼孤飛鴻遊戲清瀾下霜霰
既已違唼藻何雍暇微禽尚有適而我獨悲咤智士惜
流光哀歌達長夜愧無魯陽德何以迴羲駕

明月鑒重幃涼風吹綺疏佳人揚清謳顧影傷離居音
別黃鳥鳴條忽秋蘭舒繁華不再至歡樂寧倩餘追迨
牽牛星萬古恒不渝所思杳天末日夕增煩吁秦女善
鳴箏趙女亦吹竽竽箏竽豈不哀不如琴瑟娛織纊常苦
遲織素常苦劬嗟哉織作勤淚下沾羅襦

燭龍騰遐輝離照亘天衢室隙受餘光徒能耀一隅物
理固殊鑒各隨賢與愚楚客倒滄海提携得明珠重寶
不見賞抱價增煩紝掩袂卧空谷孰知中所須

昔遊黃金臺酒酣卧燕市哀歌傍無人泣下擊筑子黍
谷生悲風易水何瀰瀰豈無英雄者翻覺霸圖恥白日
忽復易脫冠蕡粉粹良覩邈山河撫劍中夜起

雜詩

圓象無停晷四序迭相循灼灼春華敷歛忽委埃塵候
蟲善審時鳴鳥常司晨如何建名士遲暮多苦辛衝波
鮮安舟歧路恒推輪順風響易遠却行難及人鐘鼎鑄
峻功竹帛垂逸民靜躁雖殊域德業終同倫慷慨感中

情高駕良可尊

送傅山人遊羅浮

仙山矗遐陬，蘊奇信靈造。掩靄蹴重溟，巍峨冠穹陰。
室引陽輝霧，谷通霞島玄。溜澤難枯炎，林蕊還早故。
鴟無留丹煮，石有遺老神。境誰能躋玄，蹤爾方討祕。
檢洞中尋塵踪，雲外掃陟霄。攀若華，憑厓掇朱草。
吹萬固不同，得一以為好。喧彼蜉蝣士，夸毗喪其實。
何當榮茅龍吸景，滌幽抱。

金匱要略

卷二十八

御選明詩卷二十八



總校官庶吉士臣侍 朝

校對官檢討臣蕭九成

謄錄監生臣傅瓊芳

欽定四庫全書叢要

集部

御選明詩卷二十九

詳校官原任事臣
李斯咏

欽定四庫全書
御選明詩卷二十九

集部

御選明詩卷二十九

五言古詩十四

宗臣

秋夜省直

驅車即高扃秉燭照清池冉冉見芙蓉白露被華滋仰
見明月光三星燦以垂蟋蟀鳴重階繁聲一何悲感之
長歎息嗟此陰陽移鹿鳴思野草宿鳥懷故枝人生貴

適志羈棲亦何為行行返舊服去去清江渭此意良未
申空令達士嗤

擬古二首

冉冉江上蘭燦燦江中芷我友遠行役駕言適江汜江
汜波浪深歎息從中起昔別春卉敷今思慕躊紫遊予
不旋歸浮雲日千里

驅車事行遊巖畔見芳草芳草綠以萋蓀之遺所好徘徊
豈云宴悠然傷我抱不畏芳草歇畏此闕山道闕山

阻且長客子行將老

懷謝山人茂秦

驚飈動四野白露下前除攬衣起四顧悠然懷所思所思亦何在乃知漳南居朝設穆生醴夕曳鄒陽裾西園事行遊飛蓋列應徐近者日以親遠者日以疎不念同心人所須在音書音書不一寄何以慰躊躇三復游燕篇躊躇聊以舒

寄子與

清晨發東郊蘭蕙何灼灼採之遺我友我友在京洛道
路邈以修羽翼誰能托但恐霜露垂馨香日零落

楊氏園亭餞別謝榛

離思忽超越逍遙事行遊散步過華池芙蓉夾芳流悲
哉蟪蛄鳴淒切動我愁凝霜莽零落明月澹飛樓感此
歲華暮耿耿生百憂居者不可去行者不可留去留兩
不愜何以慰綢繆

留別子培舍弟

驅車上河梁顧瞻舊鄉國倉卒骨肉親彷徨動顏色子
亦竟以南予亦竟以北本是雙飛鴻胡為垂羽翼送子
從此歸涕下不能食子其從遠猷慰我長相憶

秋夜寄陸子和

攬衣步前除白露被高桐枝葉莽零落大地回悲風明
月起夕愁東壁鳴寒蟲四時一何速天地無終窮嗟彼
客遊子終歲常飄蓬十月寒無衣薇藿腹不充何事不
歸來孤此青桂叢欲寄尺素書不見雙飛鴻

徐中行

得于鱗書

伊予河梁別楊柳方依依分手幾何時蟋蟀鳴庭幃商
鼯率已厲白露沾人衣感時懷同袍中心愴以摧不惜
故人遠但傷知音稀長歎謝流俗高卧掩重闌忽逢雲
中翼開緘見音徽殷勤骨肉言夙昔歲寒期臨風再三
讀慰我長渴飢喜極復垂涕願隨黃鸝飛

春暮將赴汝南廣川舟中寄懷京邑諸遊好三

首

昔來嚴霜零春陽忽已暮盛年不再逢嘉會豈常遇何
況凌雲才藝苑振高步眷予失羣羽不吝千金顧留連
曲水游感慨河梁賦嬿婉能幾時俛仰即岐路車馬盈
道旁孰測心所慕冀闢何峩峩浮雲日馳駕斂轡臨長
河徘徊不能度

浩浩黃河流冉冉白日晚驅車渺何之南遊洛與宛五
馬道踟躕十步一顧返言念同懷人亮節不可諉談天

碣石宮置酒華陽館高文敷瓊瑤清歌命簫管携手遠
追隨思情一何婉居者弗克俱行者日以遠春暮無歸
鴻何由寄情款

黃河多悲風白日廣川陰驚沙蔽天地方舟猶滯淫躡
躅將安適曳履援鳴琴一為清商曲灌木俱悲吟知音
一以隔離思故難任在近多遺遠日月易浮沈伊余歲
寒契莫忘初別心願言厲高羽千載垂詞林瑤華倘可

嗣引領伊川尋

吳國倫

泛九曲溪

林端日已歇心賞未云足言携武夷君泛此雲溪曲

秋夜同周子徵珠江泛月

良夕豈易逢奇遊夙所慕暝陰薄層城浮雲莽相赴須
臾明月生澄空皎如素縱艇隨輕潮披衣下纖露鬢鬢
海市通相將天河渡中有弄珠人亭亭出煙霧微颺動
鳴環綽約清虛步手裂雙扶桑化作千琪樹幻景良若

斯翛然啓冥悟

夏夜偶涼即事效梁人體

炎方雨忽霽夕閣涼如秋星雜簷螢落河連枝鵠流榕
陰滴衣桁荔色炯簾鈞月擁玉壺上天階珠浦浮輕颺
動白苧密篠鳴蒼鳩拭簾冰初合提紈雪未收不寐憐
光景長吟步斗牛山煙微入幔海氣積為樓病當三伏
起老作九真遊江漢渺何許闕山悵悠悠

張佳胤

詠懷

毒暑不辭鍛嚴冬尚為漁裘葛有本性生事因其居伊
予觸世網轉與青雲疎一謫孟諸野再遷首陽且素位
守明誠窮塗豈歎嗟貴者日以貴寧得辭勞劬賤者日
以賤庶幾遠禍樞

立秋簡徐子與

涼風厲商氣颯然驚早秋白日下圓景大火西南流年
序忽不處陳蔡難久留案牘繁以迫胡為日綢繆洪河

逝如斯草蟲夜啾啾凌厲緬千古遺則懷前修女蘿挂
喬榦玄蚓吸深湫託勢有崇卑適志其良謀

三甫入渝予不能謁承枉書問且督南征並訂
郢都之會而寄以詩

良時罕再至嘉會復何如孟冬厲霜氣蓬蒿沒敝廬興
言念友生抗旌向巴渝便欲往從之山川鬱盤糾感茲
綢繆意遠及銅梁書加餐字未畢殷勤勸脂車漁樵計
已定樊籠日愁予聞君下夔子目極生躊躇孤懷入大

江萬古只東趨郢歌有白雪期我獻歲初醉罷陽春臺

然後策驪駒

寄題永嘉王陽德陽湖精舍

招隱豈在深智者秉微尚伊人卧陽河幽襟謝塵鞅丹霞遞崇椒南北兩鴈蕩萬象厲景光凌緬非一狀鷗夷任所之滄浪發高唱扁舟就何時逝將剝川放

俞允文

登毘盧閣

古閣秋氣清千里減煙霧連山開雲秀頽城斷行路殘
僧戍荒齋寒鳥落高樹中多故人情停杯日空暮

秋懷詩

涼風金石勁悲氣壯隆烈晶宇蕩暄濁輕脆競摧折松
柏有殊性遂與衆卉別是時陽鳥至叶嘯霜中月力盡
羽翼單欲奮不得發何以表天骨沈吟猶未決

園居

窮居寡儕匹園廬有餘清落葉覆荒池疎林映高城野

田刈穫盡霜畦疏復登寒月無密影中夜露氣凝是時
囂煩息沈思方入冥沈冥乃道真一悟還自驚

遊聖像寺作

野寺始獨到新晴欣夏涼芳條青叢叢竹陰覆房廊寒
棕剪高翠過雨桐花香川梁通煥景林殿疎夕陽耳目
暫清暇都將塵垢忘何時來永棲放跡無何鄉

晚晴溪上

暑雨池上歇衍漾菰蒲清涼陰滿庭戶新雲依樹生天

風冷然來飄飄欣體輕始悟幽事愜彌令茲意平

送王明善

并序

王明善屢試不合嘗鬱鬱不樂遂以乙卯六月北
轍朔都以展所蓄積且將復觀塞垣求古興衰之
所由余謂以彼其才而偃蹇若此則雖君山放逐
亭伯流離殊未足增其憤懣也因寓於詞以述乖

離之思云爾

威鳳集珍條積風限高翔巨鯢志江海尺澤焉足量懿

茲中林士敷文聊頡頏然寡徒偶舉足蹈峻防伸眉
竟何階念之鬱中腸抑我同心歡乖離越他鄉他鄉三
千里道狹草木長白露浩已盈但恐霑衣裳

送葉伯寅遊南都

朝日揚素景零露泣盈條歸鴈辭碣石噭噭厲曾霄念
予遵舊都整策陟巖椒北眺窮朔垂東瞻越江濤崇雲
象山岳雙闕鬱磅礴過彼雙闕間冠蓋相遊遨四節隨
躋逝茂時之嘉招駿驥棄不收踰足有餘騎所期必鴻

舉齊轡羣龍朝非子良見睠豈復繁塲苗信心愜中賞
沈吟結清謠共期玄冬月觀謫憩林巢

送梁伯龍游楚并寄周水部

浮舟入楚江浩蕩千里豁況值清秋時逸興不可遏雲
來巫峽長木落洞庭闊故人渺何許引領向天末

盧柟

酬謝逸人四溟

并序

山東謝榛茂秦嘉靖中以能詩為趙王客居鄴邸

嘗遊跡燕趙梁宋間與余相知辛丑歲余坐証繫
濱獄則杳然莫知出處近有人自宋中來傳四溟
詩集讀之乃茂秦所為者中二絕句矜余極寬擬
之禰衡李白之倫夫禰李詩賦懸日月彼雖死斯
文猶存於世若余發跡既隱又罹重法有說如山
誰肯為余傳哉因作詩三首用答其意若茂秦之
得見與否無容心焉

曹思弄文翰歌詠鄴中詩招遊七才子俱好相如詞君

隨鳬鴈圃應教鳳凰池聊拂清霞賞蔚茲瓊樹枝胡為
泛滄海令我長相思

謝客恣霞想揮手絕人羣朝思北燕里暮宿大梁雲海
日照舞席澄江瀉清漬遠遊憩靈境竒節冠秋雯黃鵠
思煙侶長鳴向夕曛

李白謫仙才禰衡賦鸚鵡緘愁投夜郎掩淚赴黃祖殺
身揚綺芬高名播千古天摧白龍鱗雲斷黃鶴羽感此
遠謝君沈吟望梁父

重寄李子理

麒麟出魯郊商鉏為不祥向非孔仲尼何異犬與羊所以路傍人按劍嘿夜光近時青雲士豈無魯連子氣節苟不申甘蹈東海死世人聞此言棄之如敝屣投君勿復道北風吹易水

贈友人歸別墅

綠楊漫垂舞擺動春風情吏役甘作苦瓜期思田紫尋溪觀游鱗出谷聽流鶯別有漆園客長歌懷友生

適金陵登魏武讀書臺奉別李覺齋丈

魏武建雄圖虎視何壯哉
祇今霸氣盡空餘讀書臺
登臺覽四野蕭瑟悲風來
飢鳶獵平楚寒狐鳴城隈
林木鬱蒼然煙霜日空摧
咄嗟此山川千載埋雲雷
我亦慷慨人與君遠追
陪酒酣拂寶劍肝膽歷然
開遙望南溟間鯨鯢滄波
頰相顧起叱嘯坐使風雲
迴楊僕擁樓船聲名冠雀
嵬富貴吾自取他人徒驚
猜投鞭自茲去千里騎河魁

叙隱

仙槎隔溟渤天漢嗟無梁桂樹含丹葩
瑤草限年芳我生無羽翰翻飛不能翔
攬衣步宵月撫劍臨秋霜欲問嚴君平
此事何渺茫

送顧聖之游楚時余將往金陵

春山送行子春草惜離觴不盡孤雲意徘徊古道傍望
望金門曉悠悠郢樹蒼此中滿高詠遲爾寄江鄉

雜詩

高樓有佳婦窈窕青雲端左蔭綠桂枝右紉芳澤蘭臨
流戲珠浦拾翠游芝田蛾眉衆所嫉蓬萊翻見憐棄捐
蓬蒿中誰來希令顏徘徊歲云暮拂衣聊長歎

秋日奉別王元美比部還京

爍爍天上星皎皎巖際月蟋蟀感夜吟涼颸遲晨發山
木既云蒼江楓亦已脫遙望百里間茫茫但寥闊鷗鷺
鳴園叢虎豹步庭闈臨路別所親悵然增華髮安得瓊
芳枝慰我長飢渴

李先芳

紀行

驅車指京邑嚴冬北風急辭親何草草寸心亂如棘晨
起踐霜露日暮不遑食出門即他鄉道路安可極遙望
還山雲撫劔長太息

明月皓如日徘徊照我衣僕夫守嚴駕客子獨掩扉滅
燭撫高枕愁來不可揮丈夫重奇勲榮名世所希願同
黃鵠志施翮凌風飛

鈐岡

西行多名山遙遙望鈐簾夕霽淨嵐霏千家煙樹綠叢
桂發幽香寒泉響深谷容與蕩輕舟前波飛屬玉

蒙山

晴嵐搖旦景白雲條掩護道逢山下人借問山中路石
門幾許深龍潭竟何處長松不可攀高鳥邈焉去

郊送于韶馬上作

端居苦無悰出門見芳草遊子久不歸送客長安道垂

楊夾御堤初日正杲杲空聞黃鳥聲間關為誰好

早起

嬾朝每晏起先期戒僕御張鎧斟濁醪雞鳴九闕曙天
寒霜斷肌霧重鳥迷樹居人各掩閨匹馬自來去

擬古

青樓臨大道初日正杲杲感君桃李年使我懷春早佳
人念良夕誓結同心好磐石轉有時華池多芳草秋風
薄天雲一去跡如埽篠篠池上魚翻翻籠中鳥性情本

非宜况復傷懷抱

吳維嶽

信州同汝成遊南巖寺用李崆峒壁間韻

幽哉巖裏居戴石世所罕源泉一勺多香煙終日滿停
杯岫雲遲解帶松風緩緣崕鹿豕蹤復與同人踐

歐大任

汎湏江至修仁水尋范雲飲水賦詩處

陸陟心苦艱江行意超忽揚舲恣擊汰理榜欣乘筏昔

聞范內史於焉自怡悅賦詩散鬱陶飲水辨清濁今游
屬暮春遠放遵南粵三楓睇已遙五渡嗟應沒爰思雖
雉馴尚想甘棠爰命駕稅山椒弭蓋依林樾明霞帶遠
巒瑞靄屯崇碣樊薄粲朱櫻原陵苞綠蕨感茲時物遷
懼爾芳馨歇代更道豈殊事往迹空揭淒淒懷古吟心
賞不可越鷗夷迴泛湖子牟悵懷闋采蘭向中洲眷此
何由達沿洄發棹謳愉樂陶嘉月

十四夜元白維敬見過

曖曖天宇豁良夜皎如練鏡彩未盈規清輝遠彌見先
臨太液池却麗昭陽殿須臾出漸高厯厯指燕甸零露
浥金莖嚴更促銀箭登樓枉嘉賓鳴佩總時彥列坐引
濁醪行厨媿豐膳盍簪既非偶明德夙所眷共舒南渚
情寧羨西園讌鄙劣謝久要期爾迴光眄

黎民表

游仙

我思忽不愜藐然隘中區凌山度瑤碣肅駕自雲衢遨

遊清都闕神森吹我軀上帝垂藻旒羣后駿龍趨羨門
進仙藥王喬授玉書餐和鍊真魄精神遊六虛自握無
為寶年壽安足虞

濯足紫泥海晞髮朝陽阿雲車載玉女皓齒揚清歌參
差麗霄漢玉鱗隱相和駕言憩玄圃貽我瓊樹華光儀
忽以逝茲意成蹉跎宕宕閭風岑汎汎蒙汜波仙才諒
非偶浩歎將如何

山林非所託所思在神州寓目八紘外經過華池幽神

光颯然至青鳥從我遊靈妃奉玉觴清謠自相酬歡娛
未終夕曜靈不可留山川夐綿邈白雲良悠悠安得不
死藥千載復來求

同丁戊山人遊白雲寺

流觀徧炎燠結賞自員嶠積陽熙層厓凝陰豁林杪雲
構何屢屢乳竇自窈窕湧洞出谷雲淵渟瑩神沼稍疲
暫憩石選勝益躋表欄楯寄躉跼軒窗瞰深窅猛簾發
鴻音寶輪晃餘照龕以曇花覆階將蕙草繞詎謂劫灰

餘遂成夷原燎棟燒芝菌生瓦坼鼴鼯嘯金薤剝石幢
汞藥遺丹鉉惠遠宣復招巫陽不可叫蕭辰命良儔
觴展竒眺感茲玄運徂念爾沖規劬關河闊舟楫雲雨
乖言笑潛艷媚煙霄冥鴻避矰繳勉敦谷口盟無貽北

山誚

予告出京師貽同好諸子

雙鳬戲中沚羽翼相因依眷言二三子疇昔同裳衣嬿
婉未及終雲雨當乖離往嬰鵠原戚今懷機杼悲貞悔

難具卜榮賤同一時衆人各有營疇能恤其私君子重明義申以皎日期采擷異封菲以報瓊玖貽

魏允中

望山懷張仲友山人

宿約杳不遂棲棲東岱麓官舍鑰重門一月成幽獨日出步小園日暮空齋宿永言懷故人漳流結茅屋昔別樹無花綠陰生夏木君常兒女嬰余且浮名逐舉頭望名山悵然傷塵目出處決何時早欲脫羈束却向此山

遊逍遙雙白鹿

舍弟東視海上諸郡余西歸

共被復今夕分携在明朝子車向北海我馬投西郊疾
塵蕩山郭密樹迴河橋相望忽相失憂來不假招芳華
色黯淡鳴鳥聲蕭條加餐縱努力何以慰寂寥

胡應麟

雜詩

曜靈薄崦嵫光景忽已夕圓魄猶未升明星爛然出寒

蛩號我前蟋蟀鳴我側涼風起庭戶樹木何蕭瑟佳人期不來延佇空歎息寧知三歲心為子長惻惻

秋日偕同志遊金華

屈子歌遠遊尚平有遐慕顧謝青雲人言尋赤松路歷覽窮幽深冥探愜情素澗壑捫巔岑林巒涉迴互崖傾黃葉積谷轉垂蘿護高峰散餘靄峭壁屯寒霧娟娟初日昇隱隱微陽暮長謠欽昔蹤獨往懷蹇步慮由忘物超道以遺榮悟迹契容成公神交子支父徘徊北山文

惻愴淮南賦，睠彼丘中人。
迴飈對巖戶。

徐獻忠

俞氏水樓

故人江樓月，照見千里心。
遊子未言歸，清光被滿襟。
西陵隱簷際，南湖澄夕陰。
持杯向木末，捲幔對遙岑。
悵然不能去，徒令江水深。

孫宜

湖上

湖上秋色半經年吾始來繫舟泊磯口聊訪垂綸臺水
光蕩菰蒲鷗鷺相與回沙明白石岸日麗青霞杯漁父
煙艇中棹歌聲相催片月出遠空蒼茫碧雲開北斗插
波落天河低野迥露下涼吹生颯然動秋懷杖藜謝鄰
叟斗酒明當偕

十三夜月

良晤既非易佳節亦復過今夕非昨夕光景忽已多霏
霏失玄霧灔澦增金波昔眄猶室隅茲升眇庭柯當扉

萬象啓側戶三星羅蕭爽候愈寂沈冥夜如何興言悅
至賞眷此成清歌

芟港

結軫倦久疴嚴裝理前遊山行稍云疲水宿良所由弭
棹臨別浦揚舲逝安流波迴路曲折雲霽天沈淳霜荻
響近渚風條鳴長洲沙翔去來鷺嶠並連拳鷗澤闊晚
漸垂江茝秋始柔遵嶼乍離合凌飈屢優游擊楫情已
乖乘槎興將侔即此締迨盟抽詞贈同舟

行視別業未稼作

徇祿返塵軌卧疴遂幽垌為圃竟不習學稼鮮所明薄
田委僮僕嬾性謝經營春陽始云改夏序亦以征輶翰
越城棲振衣事郊行既暢景物麗復感未黍盈雲葉被
畛秀風花覆阡平修渠灌細流佳實播初馨堅好類周
穡耗蠹殊魯螟利婦足遺穗築塲喜新晴澤忝我私及
秋荷今歲成麤糲甘自嘗飽煖奚更營且免洛陽歎聊

結杜曲盟

強仕

詠向長

子平謝累辟雅志在隱居乏食或有饋取足反其餘讀
易深自悟人世等蘧廬謂貧富不及謂賤貴不如勅言
婚嫁畢家事無關余同好有禽生肆意相與娛五嶽游
躅徧高風映簡書

詠王霸

儒仲有清節始亦赴徵命造廷抗高辭不肯臣萬乘歸

來事躬耕蓬瞿掩門徑翩翩故人子相過容服盛一念
兒曹羞客去卧不應賴有賢婦言不失初守正嘉遯遂
終身清輝兩相映

詠梁鴻

伯鸞古賢人乃在杵臼間夫婦共守志逃名入深山淒
涼五噫歌東出辭帝闕齊魯復荆吳長往遂不還為傭
宦無勞顧已少外患終葬烈士旁高風邈難攀

郭本

結屋

貯木二十年一屋未必就風雨日薄蝕土花起皴皺捐
棄弗忍言詬勉始結構因循復三載石雨穿寒溜枯棟
三兩橫客來不敢留人生須蓋藏輶轉事飣餌握粟出
經費厨人生怨詬自笑鳩為巢未了先白首休哉孫五
郡去官借車廈至今清白聲猶不媿屋漏

過以禎西莊

果日明西野綠蔭連松篁清風徘徊至滿座納虛涼門

窗見鳬繹蒼翠飄風光時聞讀書聲伊吾禾黍塲東鄰
有壇杏雨過生微香

郭文涓

遊西山

緬維京國遊夙憶西山勝前期戒明儕昧爽理征鎧連
鑣出都門散轡遵郊徑尼猶望晴巒迨遞陟烟磴蒼茫
紫翠分參差金碧映雲際鬱層甍風中發孤磬山光足
怡愉池色湛清灑覺花粲奇馨慧草紛延亘梵影空中

懸經聲榻前聽行恐苔痕穿嘯聞谷響應翠巘屢攀躋
朱闌恒眺凭取適情易酬息機意初稱登臨懷賞懷攬
結動幽興聊茲却喧囂庶以慰蹭蹬

馮行可

奉送景坡先生

寒煙彌宇際朔氣侵征裳有客賦遠遊我心亦孔傷交
知難為別佇立傾衷腸執手各躊躇悵望闊河梁渺渺
吳山雲風期約以長願言迅馳驅相依日月光

過文衡山先生停雲館

緬昔玉堂仙高情屬丘壑梧竹羅庭除文史祕齋閣欹枕待春鶯調絃驚夜鶴羊裙書更精鄴架才偏博神理寄沈冥音容已寥落我來讀遺文私心竟誰托

雜興

夜長苦難寐薄幃鑑明月披衣立中庭星漢爍以列夜分羣動息蟋蟀哀音徹念我同心友夙昔展歡悅如何金石交三年傷離別離別何足恨履行貴無缺丹青信

不渝在遠逾昭晰蒼蒼松與柏各自零霜雪詎學女蘿
草柔枝相糾結

邵圭潔

對月

秋空淨無氣嘉月照涼宇欣逢此良夜門外即遐旅懷
舊鮮歡悰乘光欲高舉所思况非遙形隔不得語徘徊
孤影邊嗟哉乏雙羽

葉春及

飲陳異卿宅即席賦得帝字

黃公避秦皇子陵傲漢帝萬乘彼不榮五斗吾何利邇
來脫桎梏翫篋聊避世田父尚不辭况乃夙同志高堂
敞華筵上客縱橫至日暮飲未休舍坐還席地屢舞倩
人扶歡言答賓戲因思劉參軍荷鋤有深意

鄧元錫

雜言別傳陳二友

羲娥無停轂青陽忽朱明柔條奮翹柯原隰何青青往

者日以徂來者日以榮嗟余至寡劣希聖徒有營邁往
信不力逾覺時序傾我身所以立豈不恃友生奈何同
心侶中道各有程戚戚增紓思薄言寄深情

古詩送王子仁

噓物寧非風風勁物乃戕駕車寧非馬馬疾車以僵百
獸伏駒虞衆禽景鸞凰豈無鷹隼姿搏鷺難為良

別江子

良農程歲功豐凶非所諳良賈經儲積利鈍皆所甘曾

以水旱故棄捐任與負曾以貿易薄棄捐絲與布十年
經世業料理亦有素奈何乘輶輶中達思改驚人生各
有職治職各以勤永誦蟋蟀篇愴然念先民

潘緯

宿白嶽社山中

白社負幽期青山寄空宅偶携林中友重卧巖下石雲
歸忽閉關月出更留客不著塵夢還潺湲響終夕

春日憶山中舊隱

及茲農事候令予歸不間本無西疇耕為趣東風還舊
廬在林莽樹石繁其間時春方雨餘好鳥聲關關門柳
媚柔條蘿徑滋苔斑澗鳴始流泉座對初青山寓目但
成景偃仰多歡顏此鄉能似否寧不思迴轍

吳承恩

對月

人言天上月中有姮娥居孤棲誰與共顧兔銀蟾蜍冰
輪不載土桂樹無根株紛紛黃金粟歲歲何由舒一閑

千萬年玉顏近何如相違咫尺照我闌干隅一杯勸
爾酒為我留須臾

曹大同

秋日田居

屏居謝人徒朔風吹寒雨遠樹既盤糾漂雲亦交互愁
鵠戀故林隱豹諳長霧羃羃歷川光昏蒼茫野火聚耳目
暫無擾閒情託豪素拙訥罷干時賞心於此遇飛光忽
我道咄咄歲云暮眷言採三秀頹齡儻能駐

遊仙

有道百靈初無名萬物始九氣煉中和三元謝甲子化
昇隨感遷清越徹表裏玄圃御斑鱗丹丘乘赤鯉左拍
浮丘肩右躡羨門趾山成數寸塵海無三尺水長嘯宇
宙外超然得不死

孟思

秋夜期友不至

西風散秋聲搖我庭間樹月寒草露光山靜星河曙
林

鳥相向啼昆蟲紛若語美人期不來幽客徒凝佇

周沛

別顧孝常

馬離鳴故羣人去懷心知憶昔遭君始意氣如連枝如何倏離別旦夕殊歡悲滔滔斯世士孰與吾心期言念古之人同心不同時同時復睽隔何用同時為

冬日

滯雲迫冬日山川掩重岡引領望郊邑遠樹鬱蒼蒼浮

雲馳白晝迅風激衣裳中野少逢人乃見鳴鴈翔我有一束書因之以遠將其多至萬言其音悲且傷終以重見辭翩翩各一方攬涕下長坂躊躇不能忘

張之象

謝臨川遊山

客行曠登覽羈心展遊陟累糧度瑤岑振衣尋石室源深洞屢迷徑險巖逾密重林散輕霧絕壁映初日鳥鳴識節變草綠知春及天桃始發溪猗蘭漸盈澤採藥遵

靈丘援蘿入幽谷，纏邈隱士居。
想像仙人宅，朝窺鸞鶴逝。
夜聽猩猿泣，水鏡含清暉。
松門帶暝色，近澗虹文丹。
遠峰嵐氣黑，雲歸影難留。
泉飛響易急，觀奇道轉遠。
探異情未畢，候月弄澄鮮。
餐霞羨高逸，適已物自忘。
達生賞無極，終然得所遣。
儻值同懷客，

春日遊燕子磯

古稱秉燭遊，行樂恐迨暮。
策駕尋名山，居然得真趣。
展宇開霽旭，熙陽斂昏霧。
雲錦被奇峰，水鏡含芳樹。
眷茲

風日佳開觴藉蘭杜頗懷披襟友諸美難具晤流鶯稍
出谷飛花已盈路暢哉人境外屏跡遺世故勿為京洛
士縕塵染衣素

朱永年

詠懷

南鄰競歌鐘北里吹笙竽我獨甘寂寞守此貧賤廬蓬
戶不掩簾簾瓢常晏如負郭住窮巷門無長者輿彈琴
發雅操誦詠詩與書安神在閨房澹泊思玄虛至人求

鬢旁鬚榮名非所須

丘雲霄

思家

木落愁遠山鄉心夜來絕不見渡溪人但見渡頭月高
堂憶遠征妻孥望天末舞衣生輕塵自貽此契闊白雲
起江頭直向武夷沒

溪月初出水

溪月初出水照我清夜堂沈憂不成寐踟躕步寒光飛

鳥深夜號繞樹林煙蒼有懷空自知默默心摧傷

怨詩

江石如龜甲隱隱浮明沙不障東之水偏驚游子查游
子去鄉國長風吹斷霞斷霞只在天游子去無涯泠泠
秋已老飄蕩未還家

施漸

示兒陽得

喟然寘琴書白日閒如此共以蓬蒿身相去南北里高

樓多遠心流雲過如水有意不能言悲來但思爾

晨起行園治蔬

處病情方愆覽籍亦芬結止跡丘樊間喜與荷鋤列晨
星沐未遑周葺幸餘力夙英始斂華密露若瑩雪螽趯
感離歌鳴鳴及幽月萋萋瓜畔空厭厭豆畦歇觀化有
消虛徵情既伸屈庶幾東陵隱豈伊公儀哲永此藿食
資耕鑿藏吾劣

齋中雨歇自述

高窗晦積雨連晨娛篇帙耽慵情方宜嗜寂意尤密風
柔園條變溜溼階蔬出宿陰漸已收幽禽時唧唧隱几
欲忘言斜光透雲日

晚步池上

弄翰乘暇日池上步逍遙寒魚翻在藻落葉亂鳴條流
序忽如此寸心久自要蓬飛定有止意遠不嫌囂常念
沮溺輩躬耕趣獨超

贈人遊蘭亭赴陳山人約

靄靄深竹林林深阻修澗清川流其間懸崖俯可辨春
蘭日以芳風氣日以變君往對山人如逢昔人面

秋日與華從龍俞汝成泛湖上

相携出井邑輕舟汎秋水樵響滿晴山游靄緣原起濯
足湖上流浩思方如此

嚴怡

擬古

采采南山桐十年成一琴製者豈不苦謂世有賞音持

以奉君子不與我同心擬鑄鍾子期家無雙南金

李奎

遊天竺寺有懷謝康樂

秋光澹巖岫入谷聞晨鐘白雲嵌紫芝峰朵開芙蓉林
香晝自結夾道羅長松沙廣草煙薄溪深花露濃梵籟
鬱飛鶯咒潭降毒龍間禽互交語道侶時相從久矣悟
空寂齋心禮金容精廬隱暮色蔬食修珍供還憩崖亭
上永懷高人蹤

採藥

山中宿雨過嶺上明霞赤荷鋤入南畦藥苗始堪摘黃
精種未鋤紫芝已盈尺隔水望茅茨還歸煮白石

張元凱

漁父

溪橋轉山徑湖水碧於苔漁舟柳陰下舉網得四腮樵
薪猶未至新醅業已開團園坐妻孥不簪亦不羈欲要
采菱人西風吹船回簌簌蘆葉響月上潮正來波濤非

云險夢寐良不乖向達楚大夫言言傷我懷

樵父

偃樹春不起繁條秋彌叢長鐸入空谷厯厯摧枯蓬形
骸肖山鬼趨捷輕狙公亥熊夕相避猛虎晝不逢素履
往無咎險阻窮能通有時不歸來高卧山之東積薪擬
待價沽酒明月中桎梏軒冕者終焉媿此翁

圖山朱都尉過訪留宿草堂中夜不寐情見乎

詞

有客江上來柳下住雙槳身白儼如瓠巨口仍廣顙相見嬾長揖落魄高陽黨呼兒且沽酒把臂坐草莽十年交自傾片言心覺爽明霞四散飛長庚獨先朗蝙蝠撲檐間熠燿行草上涼風西南來刺刺枝頭響下榻不能寐空庭共頰仰慷慨醉中言何時起李廣

志別

祖道一尊酒涼風江上生楓林一葉丹秋動千山聲星離越溪水雨散吳王城我昔游燕趙居人送我行今我

亦送客酒盡淚欲傾乃知送我者掩袂多至情

汶上阻雪

我行阻徐方日夕望吳國積雪覆臯原千里同一色
門前偃柵橫屋際孤煙直黃河水正堅芒碭雲來黑狡兔
潛以伏飢鷹竟何食客子糧枯蓬主人春殘稷何日見
朝陽肅彼南歸翼

李元昭

新昌蓮峰呂山人夜携魚酒過訪丘中因有此

01739861
浙大图书馆

作

日入林壑晦乳犬吠簷隙下榻爇蘭膏邂逅滄浪客菰
條貫溪魴瓦瓶挈村醪傲睨不作禮蒼霞飄短檄班坐
肆吟笑河漢倚寒席墟落交廣風松篁自相戛優游塵
外懷秉此杯中適第覺五情爽冥然會玄默

黃喬棟

半峰菴聽秀上人彈琴

高僧理鳴琴古調盈人耳濤生松下風龍起鉢中水聽

罷猶冷然月出疎篁裏

陳第

詠懷

尋流溯江漢矯首望河汾惠風靄四野上有珠泗雲慷慨瞻懷慕曠世不可羣歸來長歎息篝燈理遺文亦有二三策末由播清芬高山徒仰止微言竟誰聞

水風偶相遇綺文自炳煥草木花實敷燧燧光且爛熳殊者何人劙力彌昏旦秦漢錯雜陳標掇成篇翰試以

道眼觀臨流再三歎

清寧育萬品種種成形色桃李本繁華松柏挺孤直鷁
鶴老一枝鷗奮垂天翼小大各有宜修短稟物則君子
履吾常何入不自得嗟彼冥行人貪天為已力擔石慕
千鐘下僚營要職畔羨轉相尋憧憧如糾繆鳥飛高戾
天人心於何極所以老氏書止足昭玄式

再送董崇相戶部課績

歲昔在乙巳送君入上京亂流濟扁棹兩岸多鶩聲一

別詎能幾今又送君行濃談殊未盡東曲還憤盈燕薊
正雨雪胡為獨北征行塗登泰山吳門望正晴上有無
字碑秦漢銘已傾秣陵舊都地守重隔江城國初宿屯
戍五衛列藩營自從崩圮後洲渚坦以平何當存犄角
識者為心驚袖中有短疏意在扣宸明遠臣既建白公
輔會相成願君且靜默造物忌取名

四憶詩

憶昔在清漳帳下多童冠切磨論至德餘義及篇翰別

來四十年凋謝已大半登高望海水茫茫無邊嶼欲贈以瓊瑤踟躕歲復晏

憶昔在薊門坐中多劍客蕭蕭邊馬鳴風高秋草白別來三十年采薇異夙昔登高望紫塞朔雪沈幽積欲贈以寶刀徘徊空脈脈

憶昔在粵東尊前多漁父泛海尋仙山蓬萊若可覩別來已十年伊人且塵土登高望嶺表浮嵐帶陰雨欲贈以明珠惆悵肝腸腐

憶昔在武當山中多道侶冒雪陟危峰携筇凌險阻別
來已五年飄飄一羈旅登高望漢水瀟湘迷楚墅欲贈
以金丹歎息獨延佇

歲暮客居呈弱侯

仲尼本周流忽發歸與歎意在就六經匪為思鄉串嗟
我老無聞託興遊汗漫邈想古通人反側常宵半秣陵
一君子少小登道岸嗜學自性成叢易旦夕翫近得從
之談悅上中天觀詩書數千載立語窮真贊欣然遂忘

家何知有歲晏

晨起臨北窗連陰未朗徹昔出桃李花今看霜霰結爆
竹頻有聞天涯近除節而我客南都心跡俱寂滅外戶
常反扃四壁幽以冽執爨雖一夫饔飧良靡缺晏坐展
圖書祛寒親麴蘖時與達人談千古共參折清燈耿前
除談罷自怡悅回首風塵人遲暮正愁絕

陸采

遊仙

明車拂天罡白日駐軒蓋招搖舞青霞芝體滌玄澑仙
者四五人黃眉笑相避玉虬偃靈風瑤鞭靜垂帶謂余
來何遲羞以盤龍膾雙雙紫鴛鴦遊戲蓬池內靜婉歌
未窮雨師肅歸轡望望紅羽旛追之了無際

袁襄

田家

誰言田家樂所樂亦豈常耕斂稍不給豐歉復相當五
月了蠶事十月登稻粱所入不償用間少賣多忙營營

事公私勞苦過即忘歲功已告畢蜡社聚一方酌酒宰
雞豚鼓腹坐山陽寧知朱門內晝夜羅酒漿貧富在所
遭苦樂難較量

顧聖少

留別謝茂秦

相對忽不樂愴然傷我心他鄉有同懷胡為遠分襟憶
昔醉燕市擊筑誰知音意氣獨吾子排難輕千金重以
易水歌兼之吳會吟論交豈不遠投分遂至今我亦慕

三閭南去湘之陰楚山一何長楚水一何深他日遙相
思鹿門還可尋

徐渭

眺江中怪石

乘舟坐無聊遵塗岝崿急流赴海馳怪石橫江倒仰
睇岑崎側惟見蒼翠矯覆莽映赭壁枝弱不勝鳥懸崖
窄可步聚纜密如篠舟子勿前征前路煙生草

將至蘭溪夜宿沙浦

中夜依冰澤羈愁不可控遠火澹冥璧月與江波動寂
野聞籟微單衾覺寒重託蹤浦稗根身共鷗鳥夢

柳浪堤為溧陽史氏題

夾岸千章柳青春翠浪浮如將曲池水共作繞堤流長
蛇偃青蔭水鳥悅芳柔試於垂纓處一繫木蘭舟

與楊子完步浣紗溪梁有懷西施之鄉

明月照江水載梁與子步當時如花人曾此照鉛素江
流不改易月亦無新故薄雲淡杪林晴沙泛寒露借言

伊人閨應在煙生處

白鶲

錢子易書故曰王
孫蓋鏗之後也

野性悅鳥魚客寓尚籠致正如好竹人借居亦裁詩鶲
鳥自南來貿入西河里王孫好法書籠以易吾字墨絲
繡雪衣綠罽作禡被有時嚙喉中鳴若嫋雲際日夕湖
水波秋樹葉微紫送客不出門白玉掃長彗

送蘭公子

阿翁學師
也揚州人

耶溪岸藻色相伴秋荷老公子竭重來傷心那可道會

日苦無多相別一何早八月廣陵濤一葉渡殘照

燕子磯觀音閣

青山如美人樓觀即奩妝若無一片鏡妙麗苦不昌茲
石一何幸值此江中央上乘巨構支下集帆與檣朱碧
得水鮮鳬鴈拂波光煙霧不見海神去萬里長我與三
友俱兼以僮僕雙日西買市飯半道謝驢韁歸來乏燈
燭微雨霑我裳沽酒不成醉頹然倒方牀猶夢立閣中

遙觀大魚翔

俠客

結客少年場意氣何揚揚燕尾跋菰箭柳葉梨花槍為

弔侯生墓騎驢入大梁

送劉君

南鴈正北歸君今復南去羽族如避炎君胡故觸暑嗟哉失路人安所避辛苦而我亦同之臨岐淚如雨

沈明臣

武陵莊雜詠

鬚眉曾石蒙頭斷齶山露齒侈放金谷園清占祇陀里池
館錯紛敷神仙自棲只丹梯引木末清泉陰巖底吹玉
招赤松緘書訊黃綺無事但鳴絃清商雜流徵

王懋明

移家湖上作

夙昔厭喧擾湖壘聊聚廬五柳陰到門客子携家初歡
言治隱計織屨兼藝蔬妻孥晒荒陋而我良自舒魚鳥
適幽性水竹澄貧居開簾峰翠繁停舟潭月虛心與勝

槩遇跡將城府疎養生黃精飯銷憂老氏書了悟損益
理何須儋石儲食力媿伯鸞攻文匪相如所長惟達命
天地寧窮予

始家湖上寄城中諸友

負郭無繙業因家濛湖瀆扁舟歸草堂東溪生夏雲居
然滿幽致得與木石羣茲地風俗厚所事不尚文童年
已樵採壯者俱耕耘予懷太古風出門日訴訴稅地給
家食借書廣前聞野趣足心目水流滌炎氛羣山映五

柳空翠常氤氳隱居以求志殷勤謝諸君

舟中與隆池彭丈酌酒

訪舊廻蘭橈風光適和煦卷帷望春山幾處含殘雨偶爾携一尊歡焉聞衆甫清言蕪古今滿引無賓主桃花笑欲言鷗鳥翔可取煙波娛性靈近將友漁父

宿玉陽山房

澗道行轉深餘霞滅殘景然燈宿山房枕席雲泉冷始知玉潭隈乃有真仙境翠微一磬幽霽月寥天靜葉落

霜漸寒秋高夜彌永不寐若有懷啼鶴下松嶺

山中待施少府

美人太古心一見即傾倒自別梁溪花相思長秋草緘
書昨寓言山中共論討把袂雖有期挂席苦不早涼月
映桂林夜思傷懷抱

姚咨

桂亭為豫章萬隱君賦

南山鬱秋霽重巒桂花白高人愛巖棲躋攀理輕策覽

彼雲木秀悠然縱所適結亭青林端幽賞非矯迹冷風
吹霞裾涼月挂石壁襲芳和天倪餌實駐顏色淮南詎
可招此意良自得願貽瑤華音一慰山中客

周詩

留別西湖兼柬孔文谷萬鹿園趙龍巖田豫陽
童南衡諸君

淹薄武林游重輪忽四望興詣謝客幽跡類向長放崇
嶺遵逶紆澄湖泛滉漾蓮刹詣諸天香臺徧昭曠聊因

杯度慈一遣迷津妄泉挹氣冽清洞厯石攢障側足凌
層梯迥與丹霞傍煙綿百雉聯巒嶼兩峰向靄越吳山
顛觀濤海門上哀莽弔遺墟懷往情亦愴攀躋匪一塗
靈異信多狀景物無遁形微尚自茲暢會心既以玄感
來寧弗亮結侶得應劉調逸每相抗傾座激懸河芳聽
企予仰綢繆林中娛萬事等飄坱發詠互酬答真賞繇
郢唱淒其徂歲陰曰歸介征榜踟蹰行復留念此意彌
廣斷梗惜臨流撫膺吐深恨

春日子浚置酒登盤門城樓縱眺

出游躡城闥聊使殷憂廓迴瞰樓閣重周覽河山錯候
禽音尚微初林蔭猶薄密煙生近堤傾曦淡遠落潛盤
狎勝引且復娛斟酌快意當遺形所在即丘壑

牟嘉叙

擬古

驅車出門闌車行復遲遲百草委霜露涼風正淒其天
寒道路艱問君將何之駕言往宛洛相從遊俠兒遊子

去萬里旋歸竟何時安得附飄風致此殷勤辭

灌木產崇岡巒巒蔽層丘芳草依澗側託蔓相綢繆美
人隔遐方宜為君子仇未及登君堂歲月倏已逝慨彼
芙蓉花爛漫當清秋采采欲為贈道路阻且脩願君保
明哲妾心亦何尤

遊江心寺登康樂亭子

輕舠截奔浪水國散微陰沿洄眺孤嶼寶塔凌雙岑茲
遊夙有期始得遂幽尋淵室接梵語花臺繞龍吟滉養

元氣中日華映珠林謝公有遺蹟孤亭俯江尋曠懷寄
玄賞海嶠振徽音清芬詎可挹高情傾古今西堂夢不
返池草春自深

同方用晦遊西谷

褰裳涉西沚披莽散輕矯稍觀山川異煙火隔墟落沿
洄傍溪曲窈窕入穹壑幽尋葛可捫掩曖路疑錯巖雲
冒巾幘霏翠灑林薄汲深俯重淵采秀陟崇崿坐聆伐
木音益感良遇樂返策復流憩逍遙展歡謳眷茲丘園

賞胡為就羈縛

漁家用從姪存勇韻

茅茨傍江口，斷岸依漁梁。
榜舟蘆花渚，間歌和滄浪。
日出水禽散，風至浦帆張。
青蓑溼不解，卧看南山蒼。

金匱正言卷二十九

卷二十九



御選明詩卷二十九



欽定四庫全書
卷之三
校讎官印

總校官庶吉士臣侍郎朝
校對官檢討臣蕭九成
謄錄監生臣傅瓊芳